

29 DEC 1998
Mahathir-Cinta
MAHATHIR LANCAR GERAKAN CINTA NEGARA

KUALA LUMPUR, 29 Dis (Bernama) -- Perdana Menteri Datuk Seri Dr Mahathir Mohamad hari ini melancarkan gerakan Cinta Negara melalui laman web khas Kementerian Penerangan, bagi membolehkan rakyat Malaysia meluahkan rasa cinta terhadap negara.

Orang ramai boleh menyatakan kecintaan mereka kepada negara dengan melayari laman web itu pada alamat <http://kempen.gov.my>.

Pelancaran itu dibuat secara ringkas pada majlis perhimpunan Kementerian Penerangan di foyer Wisma TV, Angkasapuri di sini sebaik sahaja Dr Mahathir selesai mengadakan rakaman perutusan tahun baru di RTM.

Perdana Menteri diiringi oleh Menteri Penerangan Datuk Seri Mohamed Rahmat, pada majlis itu.

Mohamed berkata, Cinta Negara merupakan gerakan kesedaran bertujuan memantapkan perpaduan dan menggerakkan sokongan mereka terhadap usaha-usaha kerajaan menangani kegawatan ekonomi, dan merencanakan kembali pembangunan negara.

Sasaran utama gerakan Cinta Negara ialah pemuda pemudi, agar mereka menjiwai pengorbanan generasi sebelum mereka, dalam membangun dan memakmurkan negara dan mewujudkan keamanan selama ini.

Dalam buku cenderamata pelancaran gerakan itu Mohamed berkata, proses pensejagatan atau globalisasi yang sedang berlaku dengan hebat pada ketika ini menjadi senjata baru kepada kuasa-kuasa dunia untuk menyerang kedaulatan negara-negara di dunia seperti Malaysia dari segi politik, ekonomi dan sosial.

"Penjelmaan kempen jahat itu kini sedang diharungi dalam bentuk cabaran ekonomi yang diikuti dengan serangan politik," katanya.

Logo Cinta Negara yang dilancarkan oleh Perdana Menteri hari ini memberi pengertian untuk menyemarakkan semangat kecintaan kepada negara di kalangan rakyat Malaysia.

Lambang hati membayangkan perasaan cinta kepada negara sementara gabungan warna asal jalur gemilang, bagi melambangkan ketahanan nasional dari segi keamanan dan kemakmuran serta kestabilan ekonomi.

Huruf "M" yang berdiri megah dengan tapak (serif) yang teguh melambangkan kebanggaan rakyat kepada negara.

Warna biru dengan garisan luar berwarna putih adalah bagi merakam kesetiaan rakyat keseluruhannya, sementara warna kuning adalah bagi melambangkan kedaulatan sistem pemerintahan negara, sejak turun temurun.

Bentuk bulat logo itu dengan bingkai biru adalah bagi membawa erti kesempurnaan di negara ini.

Dr Mahathir turut menandatangani buku "Cetusan Rasa" pada akhir majlis itu.

-- BERNAMA
AFY MNY RI